



Акафист

святому преподобному

Трифону, Вятскому чудотворцу

Кондак 1

Избранный угодниче Христов и чудотворче, преподобне отче Трифоне, святостию жития и чудесы твоими возсиявый стране Вятстей, яко звезда богосветлая! Похвальная восписуем ти, любовь твою творящую всечестную память твою: ты же, яко имея дерзновение ко Господу, молитвами твоими от всяких нас бед свободи зовущих:

Радуйся, Трифоне, преславный чудотворче.

Икос 1

Ангела тя во плоти суца познавше, преподобне, и велия благодеяния от тебе приемше, яко чудотворца преславнаго тя славим и сие тебе со умилением зовем:

Радуйся, северныя страны благоуханный крине.

Радуйся, отрасли благочестиваго корене.

Радуйся, от младости в добром наказании воспитанный.

Радуйся, издетска сопричтенный в сыновство Отцу Небесному.

Радуйся, благочестивыя матере твоея отрадо и утешение.

Радуйся, братию и сродники твоя своим благочестием удививый.

Радуйся, целомудрие девства невредимо сохранивый.

Радуйся, от сердца твоего вся искушения юности отгнавый.

Радуйся, к Богу имевый рачение велие.

Радуйся, Господа ради путь тесный и скорбный избравый.

Радуйся, дольняя горняго ради оставивый.

Радуйся, яко спасения иский, во страну чуждую стопы твоя управил еси.

Радуйся, Трифоне, преславный чудотворче.

Кондак 2

Видев, яко матери и братия твоя восхотеша браку твоему вдати, и чистоту девства паче возлюбив, дом отеческий оставил еси и странник быти предсудил еси, да сподобишися вечно пети Христу Богу: Аллилуиа.

Икос 2

Разумев козни, от врага спасения нашего содеваемыя, терпение, пощение и молитву к Богу противу поставил еси, всеблаженне отче, и яко нищ духом же и телом, от града во град и от веси в весь переходил еси и во оных приметатися ко храмом Господним возлюбил еси. Сего ради зовем ти:

Радуйся, вся красная мира сего ни во что вменивый.

Радуйся, нищету телесную и духовную возлюбивый.

Радуйся, рубища ветхая, яко одежду драгую, на теле своем носивый.

Радуйся, алчною и жаждою, мразом и зноем тело твое изнузивый.

Радуйся, чашу поругания правды ради до конца испивый.

Радуйся, за творящия ти напасть, яко за благодетельца Господу моливыйся.

Радуйся, терпением твоим мира сего злобу победивый.

Радуйся, огнем молитвы твоея вся стрелы лукаваго попаливый.

Радуйся, силою твоею веры языческая суевѣрия потребивый.

Радуйся, красоту селения Божия возлюбивый.

Радуйся, приметатися в дому Божии изволивый.

Радуйся, яко странник и пришлец быв на земли, ныне в обителях небесных вселился еси.

Радуйся, Трифоне, преславный чудотворче.

Кондак 3

Сила Божия дадеся ти, преподобне, егда в честном странствии твоем некоего младенца именем Тимофеа, немощию лютою одержима и близ конечнаго издыхания бывша, молитвами твоими исцелил еси, и здрава того сотворив,

купно с родители и присными его воспел еси укрепляющему ти Христу Богу: Аллилуиа.

Икос 3

Имея помысл чист и душу непорочну, блаженне отче, уразумел еси суету мира сего и непостоянство, и вечных благ возжелев, мира сего отреклся еси и пострижение иноческое приял еси. Темже ублажаем тя, преподобне отче, и славяще еже о тебе изволение Божие, вопием ти сице:

Радуйся, яко земная отринув, умом твоим к небесным востекл еси.

Радуйся, яко к вышним течение свое выну управил еси.

Радуйся, смирение возлюбивый.

Радуйся, послушания рачителю.

Радуйся, молитв кадило благоприятное.

Радуйся, слез покаянных неоскудный источниче.

Радуйся, благое иго Христово на себе возложивый.

Радуйся, на высоту безстрастия возшедый.

Радуйся, всего себе Богу предавый.

Радуйся, от смерти напрасныя изволением Божиим дивно сохраненный.

Радуйся, явлением святителя Николая обрадованный.

Радуйся, от недуга лютаго им исцеленный.

Радуйся, Трифоне, преславный чудотворче.

Кондак 4

Бурю искушений и бед от человек, злобных на тя святого ради жития твоего, преподобне отче, с кротостию претерпевая и единого только на потребу ища, еже како Богови угодити, Богом водимый, достигл еси Вятския страны, и во граде Хлынове обитель во славу Богородицы создав, в ней с лики иночествующих немолчно вопиял еси к Богу: Аллилуиа.

Икос 4

Слышавше христоименитии людие града Хлынова, яко обители иночестей близ града того основание положил еси, Трифоне богоносне, возрадовашася радостию велию, и яко ангела Божия тя почитаху, служаще от имений своих к устройению оныя обители и вопияху тебе сие:

Радуйся, тайнаго веления Божия послушавый.

Радуйся, Авраама вере поревновавый.

Радуйся, во страну Вятскую путь свой благочестне управивый.

Радуйся, обитель иноческую тамо создати зело восхотевый.

Радуйся, храмы Божия в ней благолепно устроивый.

Радуйся, чудеса преславная при основании обители совершивый.

Радуйся, яко Моисей молитвами воду источивый.

Радуйся, Богородицы заступлению и покрову обитель твою вдавый.

Радуйся, лика иноческаго предстоятелю богомудрый.

Радуйся, града Хлынова святое украшение и покрове, Богом данный.

Радуйся, сотворивый волю Господню и ины творити научивый.

Радуйся, сего ради велий в Царствии Небесном нареченный.

Радуйся, Трифоне, преславный чудотворче.

Кондак 5

Боготечно, яко светозарная звезда, шествовал еси, угодниче Божий, в престольный град Москву, полезная обители твоей тамо устрояя и от святейшаго патриарха Иова в архимандрита поставлен быв, с милостынею мною от благовернаго царя Феодора дарованною, в обитель твою паки возвратился еси, благодарственно воспевая Богу: Аллилуиа.

Икос 5

Видев враг спасения нашего обитель твою добре устрояему от тебе, преподобне отче, воздвиже на тя неких от ученик твоих, иже противу тебе возставше, от обители твоея тя отгнаша. Ты же, на земли сие изгнание с кротостию приемый, ныне же вселивыйся в обителях небесных, услыши нас, поющих ти сицевая:

Радуйся, яко за благая ко спасению словеса поругание приемый.

Радуйся, аки кроткий агнец вся терпевый.

Радуйся, с небесе утешение приемый.

Радуйся, молчанием на укоризны отвецавый.

Радуйся, во изгнание незлобиво отшедый.

Радуйся, любовию Христовою козни вражия победивый.

Радуйся, многи обители иноческия во странствии твоём посетивый.

Радуйся, в них себе утешение и отраду обретый.

Радуйся, чудеса дивная во изгнании твоём совершивый.

Радуйся, многи на путь иноческаго жития наставивый.

Радуйся, блаженнаго Прокопия на подвиг юродства о Христе благословивый.

Радуйся, яко сый на земли яве с небожители беседовал еси.

Радуйся, Трифоне, преславный чудотворче.

Кондак 6

Проповедует присно страна Вятская подвиги и труды твоя, преподобне, в странах Архангельских, Устюжских, пермских, и светло красуется, стяжавши ты помощника и покровителя себе особне. Молим убо ты, святче

Божий, не лиши и нас грешных небесныя твоя помощи и покровя молитв твоих, к твоему бо заступлению в скорбех наших вседушно прибегаем и прославльшему тя Господу со умилением зовем: Аллилуиа.

Икос 6

Возсиял еси, преподобне, яко звезда богосветлая, во граде Слободстем, вонь же по изгнании твоем пришед, обитель Богоявления Господня создал еси и тамо вселился еси, всех озаря святостию жития своего. Сего ради вопием ти сице:

Радуйся, граду Слободскому пришествием твоим благословение от Господа низпославый.

Радуйся, жителем града того светильник пресветел бывый.

Радуйся, от них радостно приятый.

Радуйся, любовью их утешенный.

Радуйся, обитель иноческую тамо добре устроиый.

Радуйся, милостыню на устройство ея многу собравый.

Радуйся, тихое в ней пристанище обретьый.

Радуйся, присно в ней в труде и молитве пребывавый.

Радуйся, и zde иноков богомыслию поучавый.

Радуйся, ученика твоего Досифеа ко спасению наставлявый.

Радуйся, путь терпения иноческаго тому показавый.

Радуйся, образе веры и любви и ангельскаго жития в подражание учеником твоим оставивый.

Радуйся, Трифоне, преславный чудотворче.

Кондак 7

Хотение едино имел еси, преподобне, еже видети созданную от тебе обитель Богородицы во граде Хлынове. Сего ради весть от Бога прием, яко близ есть кончина твоя, от обители Соловецкия, еяже в странствии своем богоугодием достигл еси, паки во град Хлынов стопы твоя управил еси, да тамо во обители твоей, предаси дух твой Богу, Емуже от юности твоя навькл еси пети: Аллилуиа.

Икос 7

Дивно бысть, угодниче Божий, пришествие твое во град Хлынов, егда ты ветха денми суща и телесною немощию одержима, братия обители твояе отринуша, последи же, пред кончиною твоею святою, гнева Божия убоявшеся и терпением твоим побеждени бывше, раскаяхуся и в обитель твою с любовью тя прияху. Мы же таковому незлобию твоему дивящеся, вопием ти:

Радуйся, отче благосердый, враждовавшыя на тя любовь Христовою возлюбивый.

Радуйся, гнев на воздвигших гонение на тя совершенно в себе умертвивый.

Радуйся, до конца обитель твою возлюбивый.

Радуйся, паки в ней радостно и мирно водворивыйся.

Радуйся, в затворе келейнем в ней уединивыйся.

Радуйся, постом и молитвою к исходу из мира сего в нем уготовлявыйся.

Радуйся, братию твою пред исходом от жития сего благословивый.

Радуйся, поучение от Писания божественного им преподавай.

Радуйся, тем благая за зло воздавай.

Радуйся, при исходе твоём от временного жития причастия Божественных Таин сподобивыйся.

Радуйся, от уз тела разрешитися и со Христом быти желание всегда имевый.

Радуйся, о Нем едином присно воздыхавый.

Радуйся, Трифоне, преславный чудотворче.

Кондак 8

Странствие земное скончавшу ти, Трифоне приснопамятне, благоухания дивнаго исполнися келлия твоя: вериги же тайно тобою носимыя, спадоша с твоего телесе, и зрак лица твоего просветися, яко всем, видевшым исход твой, дивитися зело и возопити ко Господу: Аллилуиа.

Икос 8

Вся братия обители твоея, преблаженне, со освященным собором и людьми многими со слезами и пении надгробными изнесоша всечестное тело твое ко гробу, тобою в храме Пресвятыя Богородицы уготованному, идеже

оное, яко сокровище духовное, честно положиша. Мы же у раки твоея святыя вопием ти с любовью таковая:

Радуйся, во благоухании святыни сном смерти опочивый.

Радуйся, смерть вкусивый, тления же не познавый.

Радуйся, в ризу нетления благодатию Божиею облеченный.

Радуйся, чудесы многими от Бога по смерти прославленный.

Радуйся, яко честная рака твоя лечебница бысть всем недугующим.

Радуйся, яко всяк, приходяй к ней с верою, приемлет дары целебныя.

Радуйся, расслабленных укрепителю.

Радуйся, беснующихся от насилия дьявольскаго свободителю.

Радуйся, слепым зрение возвращаяй.

Радуйся, хромым еже право ходити устрояй.

Радуйся, немым проглаголение даруяй.

Радуйся, неисцельныя язвы дивно врачуяй.

Радуйся, Трифоне, преславный чудотворче.

Кондак 9

Ангели Небеснии радостно прияша чистую душу твою, преподобне, во обители райския, идеже Царь Славы Христос Господь венча тя венцем небесным, егоже уготова всем, возлюбльшим явление Его, и дарова нам тебе заступника и молитвенника благаго, да благодарно поем Ему: Аллилуиа.

Икос 9

Витии многовещании не возмогут по достоянию воспевати славу, от Господа уготованную святым Его во Царствии Небеснем, еяже наследник сподобился еси быти, Трифоне преблаженне. Сея славы сопричастники быти и нас сподоби, угодниче Божий, святыми твоими о нас к Богу молитвами, да радостно вопием ти:

Радуйся, ликовствуяй в чертозе Небеснаго Домовладыки.

Радуйся, гражданине Иерусалима горняго.

Радуйся, святче Божий, со всеми святыми прославляемый.

Радуйся, от горних высот к нам земнородным милостивно приникаяй.

Радуйся, обитель твою и град наш присно сохраняяй.

Радуйся, в сонних и видениях верным являяйся.

Радуйся, северныя и Вятския страны небесный особне покровителю.

Радуйся, града Хлынова неотступный хранителю.

Радуйся, всех скорбящих утешение.

Радуйся, всех притекающих к тебе скорое услышание.

Радуйся, предстателю наш благий.

Радуйся, ходатаю о нас пред Богом немолчный.

Радуйся, Трифоне, преславный чудотворче.

Кондак 10

Спасительный залог Божия благодати святыя мощи твоя, преподобне, по летех мнозех обретени быша нетленни и в новом храме Богородицы честне от святителя Ионы положени быша, иже с братиею обители и всем

множеством благоговейне лобызаху оныя,
радостно поя Богу: Аллилуиа.

Икос 10

Стеною молитв твоих, преподобне, огради нас от всяких бед и скорбей, тебе бо стяжахом заступника твердаго и предстателя о нас пред Богом неусыпнаго, да ограждаеми твоим заступлением, сице тебе зовем:

Радуйся, в бедах и обстояниих скорый помощниче.

Радуйся, призывающым тя усердный заступниче.

Радуйся, почитающих тя прошения скоро исполняй.

Радуйся, многожды прошение помощью твоею предваривый.

Радуйся, в милостех неистоцимый.

Радуйся, скорбящих прибежище теплое.

Радуйся, печальных утешение.

Радуйся, обидимых заступниче.

Радуйся, от бед и скорбей нас скоро избавляй.

Радуйся, яко непрестанною молитвою о нас Бога умилоствляеши.

Радуйся, сосуде честный, елей милости Божия к нам содержай.

Радуйся, звездо светлая, путь к Царствию Божию нам указующая.

Радуйся, Трифоне, преславный чудотворче.

Кондак 11

Пение всеумиленное приносим ти, преподобне, пред ракою твоею святою предстояще, и молимся ти прилежно: якоже отроковицу, беснованием одержимую, милостивно исцелил еси, тако и нас, страстьми многоразличными недугующих, посети и данною ти от Бога благодатию исцели, да радостно поем прославльшему ти Богу: Аллилуиа.

Икос 11

Светоподательна светильника тя вемы, отче, Престолу Божию предстояща и мрак страстей и грехов наших лучами молитв разгоняюща. Озари убо от горних высот и наша сердца, всеблаженне, да досточестно вопием ти сице:

Радуйся, света Троическаго зрителю.

Радуйся, небеснаго Сиона жителю.

Радуйся, горняго мира блаженный обитателю.

Радуйся, присно созерцай пресветлое лице Владыки Христа.

Радуйся, немолчно воспеваяй трисвятую песнь Троице.

Радуйся, луче пресветлая, от Солнца Христа возсиявшая.

Радуйся, яко и по преставлении твоём с нами пребываеши.

Радуйся, в молитвах твоих о нас к Богу теплый предстателю.

Радуйся, страну Вятскую зело возлюбивый.

Радуйся, мощи твоя святыя ей в наследие оставивый.

Радуйся, сокровище неоскудное многих исцелений.

Радуйся, Трифоне, преславный чудотворче.

Кондак 12

Благодать и милость испроси нам, преподобне, у Христа и Бога нашего и молитвенник усердный буди о нас ко Господу,

да утвердившись в заповедех Его, получим спасение вечное и тако присно поем Богу песнь: Аллилуиа.

Икос 12

Поюще подвиги предивнаго жития твоего и славяще чудеса твоя, преподобне, любовию ублажаем тя, яко многомошна молитвенника о нас и прдстателя пред Господем нашим. Ты же о святче Божий, яко благоутробен, принеси моление теплое о нас ко Владыце, да сподобит нас Небеснаго Царствия Своего, вопиющих ти с любовию таковая:

Радуйся, Пресвятая Троицы служителю верный.

Радуйся, благодатию Духа Святаго приосененный.

Радуйся, Пресвятая Богородицы слуго изрядный.

Радуйся, ангелом собеседниче предивный.

Радуйся, со апостолы ликовствуй у Престола Царя Славы.

Радуйся, мученик добропобедных сострадальче.

Радуйся, преподобных подражателю верный.

Радуйся, всех святых Божиих сонаследниче.

Радуйся, о грешных всегда Бога умоляй.

Радуйся, души и телеса наша благодатию
Божиею исцеляяй.

Радуйся, по Бозе на тя упование возлагающих
не посрамляяй.

Радуйся, Трифоне, преславный чудотворче.

Кондак 13

О предивный угодниче и преславный
чудотворче, преподобне отче наш Трифоне!
Милостивно прими сие малое моление наше, в
похвалу тебе приносимое, и предстоя Престолу
Царя Славы, умоли Господа, да сохранит нас от
враг видимых и невидимых, от недуга и глада,
от напасти и скорби и вечнаго мучения избавит,
да сподобимся вкупе с тобою радости святых
вечно воспевати Ему: Аллилуиа.

Этот кондак читается трижды, затем икос 1-
й и кондак 1-й

Молитва

О священная главо, преподобне отче наш
Трифоне! Земной ангеле и небесный человекче,

светильниче пресветлый, страну Вятскую озаряя чудесы, граду нашему стено и утверждение, бедствующим крепкий помощниче, обители твоея добрый хранителю, присный о нас к Богу молитвенниче и теплый о душах наших ходатаю! Тебе, угодниче Божий, неистощимое от Всеблагаго Владыки благодати и даров дадесея сокровище, еже целити недуги телесныя и отгоняти страсти душевныя и от всех зол избавляти с верою имя твое призывающих. К тебе убо прибегаем и тебе припадающе молимся: не презри нас, молящихся тебе и твоея просящих помощи, избави нас от враг видимых и невидимых, завистно на ны возстающих и яростию зверскою поглотити хотящих, изми нас невидимым предстательством твоим от смущения и бури и тмочисленных скорбей наших, за грехи наша нам прибывающих. О предивный и богоносный отче наш Трифоне! Скоро потщися на помощь нашу. Вознеси благомощную молитву твою ко Господу сил: страждущую страну Российскую от лютых безбожников и власти их Господь да свободит, и да возставит престол православных правителей; верных рабов Его, в скорби и печали день и ночь вопиющих к Нему,

многоболезный вопль да услышит и да изведет от погибели живот наш, да потребит Господь от земли нашея вся неистовыя крамолы, и утвердит в ней безмятежие, мир и благочестие, да сохранит обитель твою святую, град наш и вся грады и веси страны нашея от глада и губительства, от мятежа и нестроения, от запаления и бури, от нападений вражиих и от тлетворных ветр и от всякаго зла. Умилостиви о нас благоприятными молитвами твоими Христа Бога нашего, еже избавитися нам от грех наших и наветов вражиих, яко да заступлением твоим и помощию в мире и тишине богоугодне zde на земли проживем, и в будущем веце да сподобимся части святых Господем нашим Иисусом Христом, Емуже подобает и честь и поклонение, ныне и во вся веки. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
* НЕБО**